

In micado fitg privlus

La grupp da guaud surmirana gida en il chantun Schaffusa sut grevas circumstanzas

■ (anr/vi) Thayngen sa numna in lieu en il chantun Schaffusa gist als cunfins da la Germania. Là ha il Lothar termaglià cun plantas sco cun zulprins. Ina grupp da guaud surmirana è dapi trais emnas là e gida a far urden. Peter Janutin e ses collega Thomas Tschuor, selviculturs da Tinizong/Rona enfin Beiva, han decidì da metter ensemen ina grupp cun dus bo-stgers ed in maschinist. Cun ina buna purziun idealissem è Janutin sa decidì dad ir giu la Bassa a gidar en ils lieus nua ch'il Lothar ha ramplunà e stgadanà. Ma avant che pudair cumenzar è il selvicultur grischun vegnì confruntà cun dumondas finanzialas. La situaziun en il chantun Schaffusa è numnadain tut outra che quella en il Grischun. Il guaud tutga là era a bliers privats. Quels possessurs, che han per part be pitschnas parcelas, vulevan l'emprim savair dal selvicultur quanta laina ch'el cumprava u tge che sia lavur custia. Janutin ha s'accor-schì svelt ch'els possessurs surdessan pli gugent la lavur a gruppas che lavuran en accord: «E las vischnancas lessan era far in pitschen gudogn cun la vendita da la laina», raquinta Janutin, che ha era in zichel chapientscha per la tenuta. Ma en accord n'ha el sa chapescha per raschuns da segirtad betg vulì lavurar. Era Selva, l'associaziun forestala grischuna, recumonda da laschar pajar be tenor schurnada, pia tenor il temp da lavur e betg tenor prestaziun.

I renda

A Thayngen èn ils responsabels lura tut-tina sa decidids d'engaschar ina giada per in'emna la grupp surmirana. Suen-ter quella emprima emna han els pudì sa persvader ch'els han fatg ina buna tschern. Ils Surmirans han lavurà en quest temp pli bain e bunmartgà ch'ina grupp che fa accord. Suen-ter questa ex-



perientscha pudessi bain esser che era la segunda grupp forestala da Surmeir, quella da Cunter, Salouf, Riom, Parsonz cun il selvicultur Leo Thomann vegn prendida si svelt e gugent en la regiun da Schaffusa.

Stivals empè da chalzers da culm

«Igl è meglier da laschar a chasa ils chalzers da muntogna e da prender cun sai ils stivals», di Janutin. Entant ch'ins ha da sbatter en il Grischun cunter la fradaglia, èn ils quatter da Surmeir confruntads a Schaffusa cun il bletsch. «Per il mument èsi fitg nausch», di il selvicultur en il discurs cun l'anr. Era sch'igl è planiv e la cuntrada fiss bella, il terratsch

na tegn betg. Sche la maschina è passada ina giada, sfundra ella da turnar en rus-nas.

Gauds da feglia e da pigns ha il Lothar derschì a Schaffusa. Las plantas sa- jan en crusch ed a travers sco tar in giu da micado. «Quai è in grond privel», declera Janutin: «Tut tenor nua ch'ins cumenza a prender ora plantas, vegn tut en moviment.» Il selvicultur raquinta d'in intschess da 1,5 hectaras a Thayngen, nua che 1000 meters cubic laina è per terra: Quai è 50 chargias da camiu-ns. E nua ir cun tut quai? Era cun questa dumonda vegnan Janutin e sia glieud confruntads. Las vischnancas ed ils possessurs n'èn betg semtgads da

stuar deponer, transportar e vender dad in mument sin l'auter tut lur laina. Era en questa dumonda gida l'um dal Grischun cun buns contacts tar cumpraders e martgadants en l'Italia.

La fiera da laina en la Bassa funcziunia tut auter ch'èn il Grischun: «Il squitsch dals impressaris nà da l'Austria sent'ins enorm a Schaffusa.» En il Grischun sajan ins disà da contractar e martgadar cun ils Talians en in'otra furma: «Nus avain plitost clientella pli fidaivla che cumpra adina puspè tar nus.»

Carta da visita

L'idealissem d'ir a gidar giu en la Bassa

è forsa l'emprim mument vegnì franà in pau da dumondas administrativas e finanzialas. Uss è Janutin dentant cuntent ch'el ha sclerì bain las cundiziuns avant che cumenzar la lavur. Sia grupp vegnia segir l'emprim a finir la lavur a Thayngen, di Janutin. Suen-ter gajan els forsa en vischnancas vischinantas. Forsa stettian els enfin l'entschatta da matg a Schaffusa. Suen-ter n'èsi anc betg segir sch'i va enavos en il Surmeir u vinnavand per gidar en la Svizra centrala u en il chantun Berna. Tschert è dentant ch'els turnan cun massa impurtantas experientschas a chasa e ch'els laschan enavos ina buna carta da visita per il Grischun.

35 gruppas grischunas gidan en la Bassa

Enturn 150 persunas dal Grischun èn da preschent en l'intschess dal Lothar e gidan a dustar la laina dal stemprà. Quellas persunas lavuran en 35 gruppas sparpagliadas per l'entira Svizra enturn. Ulteriuras gruppas forestalas fan amogna lur servetsch d'agid en la homepage da Selva, l'associaziun forestala grischuna. I n'è betg mo selviculturs mabain era fatschentas privatas ch'èn registradas sin la homepage. Selva recumonda da betg ir a lavurar en accord en la laina da stemprà. Ella inditgescha tariffas da pajas l'ura per che las gruppas da guaud na lavurian betg cun sperdita e possian a la fin dals quints cuvrir ils agens custs.

Homepage: www.selva-gr.ch